

Ronghndwen Ronghsag Siengjniemh Va' gveiq

“Caemh daeuj muengh ndwen vunz youq gyawz, gingjsaek mumjgyumq lumj bi' gvaq.” Baez doeg daengz gawq sei neix, cungj roxnyinh seizgan lumj raemx, gij rongh ronghndwen baenz diuzsai, cix ciuq mbouj raen saeknaj baengzyoux gaeuq.

Bihaenx Bet Nyied Cibngux, ronghndwen daegbied luenz. Ndaw gyanghongh iq, gij limqva va' gveiq loenqfoedfoed, heiq rang sanq seiq cawq. Daxbuz ciuqlaeh guh le bingjmangx, diemz dwk fat nywnx, hoeng daxgoeng cungj dwg riunyumnyum gwn baenz aen bingj liux. Seizhaenx gou mbouj rox, vih gijmaz daxgoeng cungj gangj “diemz cij ndei”, cig daengz doeklaeng cij rox, ndaw diemz haenx duk miz de yawjnaek dinfwngz daxbuz.

Geiqndaej daxgoeng ciengzseiz gangj: “Gij bingjmangx daxbuz mwngz guh haenx, beij ronghndwen lij luenz.” Moix daengz Bet Nyied Cibngux, daxbuz cungj romhromh hwnqdaeuj gyaux mienh, daxgoeng couh youq henz mbek makhwzdauz, cau j lwgraz. Fwngz de gig gvai, ndaej dawz ceh makhwzdauz mbek ndaej baenz aen mbouj vengq, daxbuz cungj gangj de saeqsim lumj siuqva nei. Seiz gyaux mienh, gwnz gen gwnz fwngz daxbuz cungj nem rim mbamienh, daxgoeng couh yaengyaeng bang de uet bae, fwngz unqmenh couh lumj uet aen dijbauj ndeu nei.

Daxgoeng dai le, bingjmangx daxbuz guh haenx menhmenh noix lo, hoeng gij sibgvenq muengh

ronghndwen cix itcig mbouj bienq. De ciengzseiz ing youq bakdou laeng go va' gveiq, da de con gvaq gij mbawfaex doxraemh haenx, doek youq gwnz ronghndwen gwnzmbwn. Gou cam daxbuz yawj gijmaz, de sing daemq gangj: “Yawj boux vunz ndeu.” Gou gyaep cam dwg byawz, de cij dwg riunyumnyum, gak da cix lae raemxda. Gij rongh ronghndwen con gvaq geh gova' gveiq ciuq roengzdaeuj, youq gwnz naj nyaeuqnyatnyat de ciuq roengz ngaueuz raiz, seiz luqlawq, gou lumjnaeuz yawjraen le yienghsiengq nienzoiq de.

Geiqndaej daxbuz gangj gvaq, de caeuq daxgoeng dwg youq laj gova' gveiq roxnaj. Seizcin bihaenx, de cingq youq laj gofaex siuqva, raq rumz ndeu ci daeuj, va' gveiq loenqbyoedbyoed, daxgoeng cingq-ngamj gvaq loh, bang de gip fagcim siuqva doek haenx. Daj neix, moix bi va' gveiq hai seiz, daxgoeng cungj aiq mbaet nye ndeu, naep youq ndaw byoem daxbuz. Couhcinj doeklaeng byoemgyaeuj hau, aen sibgvenq neix hix caengz bienq gvaq.

Ndwenngoenz lumj cax, gij riz laeglumx haenx gaek youq gwnz ndang daxbuz. Hwet de ngoenz beij ngoenz gungj, caen lumj gova' gveiq deng ndwenngoenz ap gaeuz haenx. Hoeng gofaex haenx vanzlij bibi haiva, gimmyammyam, heiq rang roemz vunz. Daxbuz gangj, gofaex gorum ndawbiengz neix, cijmiz va' gveiq ceiq rox sim vunz, youq aen geiqciet ceiq siengjniemh haenx haihoengh.



doz dwg AI guh

Youh daengz Bet Nyied Cibngux, gyanghongh caemrwg. Gij rongh ronghndwen ciuqgaeuq hausag, limqva va' gveiq ciuqgaeuq loenqfoenfoen, hoeng boux muengh ronghndwen gaenq mbouj youq. Gou ndwn youq gizdieg daxbuz ciengzseiz ndwn haenx, muengh aen ronghndwen ronghsag, sawqmwh rox le gijmaz dwg “cien leix caemh ronghndwen”. Laxlawz siengjniemh ndaej con gvaq dai lix, lumj rongh ronghndwen ndaej condauq caengz fwj, lumj heiq rang va' gveiq ndaej mbin gya' gyanggyang.

Ndawgyang dai lix, mbouj gvaq dwg gek aen ronghndwen ronghsag ndeu. Daxbuz muengh ronghndwen seiz, dwg muengh gij ndwenngoenz caeuq daxgoeng caez gvaq haenx; gou muengh ronghndwen seiz, dwg muengh gij raeujrub ndaw sengmingh ciengxlwenx mbouj bienq saek haenx.

Va' gveiq loenq le youh hai, ronghndwen ronghsag vengq le youh luenz, cijmiz gij gamjcingz ndaw sim, ciengxlwenx doekrag youq ndaw geiqniemh laeglaeg haenx, lumj gij rongh ronghndwen nei mbouj liux mbouj sat.

Haemhneix, gou yaengyaeng gip limq va' gveiq ndeu, doiq ronghndwen ronghsag damz: Muengh ndawbiengz sojmiz siengjniemh cungj ndaej bienqbaenz gij rongh ronghndwen, ciuq rongh ndaw sim boux neix boux haenx; muengh sojmiz doxbiek cungj ndaej lumj va' gveiq nei, youq aen seizcou baezlaeng doxbungz. Hoeng gij raeujrub yaepyt deng ndwenngoenz yo haenx, doeklaeng bienqbaenz fwensei ciengxlwenx, youq laj ronghndwen euciengq.

(Sunh Gyahyinh raiz
Lingz Hinghningz hoiz)

Gou Caen Ngah Dwg Lwgsai



doz dwg AI guh

Ndaejgeiq seiz lij iq, moix baez daengz “Roek It”, daxmeh couh bang gou bwz noeg byoem iq le, caiq daenj geu vunj moqsaksak he hawj gou, daep fag gebbyoem gyaundeide dem, cang hawj gou saunini. Gou ndwn youq gwnz aen daengqgeg, gyaueuj ngauzngwdngwd yawj gij “yienghsiengq

lwenqda” swheij, ndaw sim nyoengx gij ndaenggon bouxmbwk rim liux.

Hoeng yied maj hung, gou yied roxnedeq gij nyapnyuk bouxmbwk.

Gou dwg bouxmbwk, lij iq maij caeuq lwgsai ranznden doengzdoh guhcaemz, lumj lwgsai nei hag fag cungq gihgvanhciengh yiengj “dududu”, miz maz saeh hix mbouj lau saekdi “cung bae gonq”. Yahgeq ranznden raen le, cix gangj gou mbaeqmbaeq bagbag, mbouj lumj yiengh bouxmbwk saekdi. Miz baez ndeu, gou caeuq gyoengq lwgsai guhcaemz “goemqndoj”, ngamq guh daengz giz gvaqyinx, daxmeh gaeb dawz gou, vix ndaeng gou gangj: “Yizcinh, baezlaeng mboujcinj mwngz okdaeuj langh lo.” Gou vix coh gyoengq lwgsai giz mbouj gya' haenx cam: “Vihmaz gyoengqde ndaej caemz, gou mbouj ndaej caemz ni?” Ngeix mbouj daengz daxmeh gangjroenroen: “Aenvih mwngz dwg lwgmbwk, gyoengqde dwg lwgsai.” Gou baez dingq ngawh liux.

Hwnj daengz sam nienzgaep, gij saeh nyapnyuk engqgya lai lo. Gou gya'z doengh, gya'z riu, gya'z caeuq gij lwgsai guhdoi, aenvih lwgsai haemq ndei gangj, mbouj lumj bouxmbwk nei bak gangj letlet. Gou ciengzseiz daiq gyoengq lwgsai daengz ranz guhcaemz, bouxgeq baez raen le, cim daengz aen lwgda yaek doek bae. Gou mbouj dawz haeujsim, hoeng daxmeh couh souh mbouj ndaej lo, najhaen

dwk doiq gou gangj: “Yizcinh, baezlaeng mboujndaej caiq daiq gij lwgsai daeuj ranz guhcaemz lo.”

Moix baez gou caeuq gyoengq lwgsai itheij guhcaemz, cungj miz vunz youq baihlaeng gou vixyekyek, gangj sam gangj seiq; moix baez gou aj bak riuhaha seiz, vunz lai couh yawj gou lumjnaeuz yawj doenghduz noix raen nei; moix baez gou caeuq daeggo ceng bouxlawz guh hongranz seiz, daxmeh cungj haeuj daeggo, naeuz wnggai dwg gou guh, lumjnaeuz bietdingh dwg lwgmbwk guh hongranz nei…… Sojmiz gijneix hawj gou nyapnyuk caez, dwg boux vunz lawz baenz lai “simndeide”, dingh ok baenz lai saeh mbouj sam mbouj seiq hawj bouxmbwk ne? Bouxboux gangjnaeuz bouxmbwk dwg “buenq aenmbwn”, hoeng gij swngghoz bouxmbwk vihmaz deng hanhhaed baenz lai ne? Gij goujhou “mbwk sai bingzdaengj” heuh baenz lai nanz lo, hoeng vunz lai doiq lwgmbwk lwgsai vihmaz cungj mbouj ityiengh ne?

Seizneix, gou raen gij vunj gyaundeide hoij youq ndaw gvih caeuq gij gebbyoem gyaundeide ninz youq ndaw habroi haenx, gij ndaengmoj miznaj haenx cungj mbin gvaq rumz gvaq fwj bae liux lo. Danghnaeuz hawj gou caiq seng baez ngeih, gou caen naemj dwg boux lwgsai he.

(Cinz Yizcinh raiz
Banh Liginz hoiz)